

GWECHALL HA BREMAN

War dôn « An Durzunel »

I

Gwechall en bro Breiz-Izel, yez kaer ar Vretoned
Ar brezoneg enorus, gant an holl oa komzet ;
Breman, siouaz e weler kalz ar Vretoned fall
O tilezel o yez koz evit hini Bro-C'hall.

II

Gwechall ar vugaligou, war barlen o mammou
A zeske ar brezoneg, yez karet o zadou ;
Breman mammou Breiz-Izel, siouaz, eul lod ane,
Zo troet gant ar galleg... Pebez mez evite !

III

Gwechall ar yaouankizou, ebarz an eureujou,
A gane en brezoneg ha gwerziou ha soniou ;
Breman ez eo en galleg, tigoront o geno
Ma zav ar ruzder war dal piou bennak o c'hlevo.

IV

Gwechall-goz ar Vretoned, forz p'lec'h e valeent
Dirag an holl oa lorc'hus : brezoneg a gomzent ;
Breman dirag an estren e weler Bretoned
O tiskouez, lorc'h bras enne, penôs in galleget.

V

O ma c'henvroïz karet, perak-ta kement-se ?
Daoust ha maro ve'n ho kreiz elven ar garante,
Ar garante vit ho Pro, kaeran hini zo 'r bed,
Karante vit ho yez koz, ar c'hosan ve komzet !

VI

Birviken kentoc'h mervel vit plegan d'an estren !
Dirak holl boblou ar bed, savomp ivé hon fenn
Laromp d'ê a vouez uhel penôs ar Vretoned
O deus o flas da zerc'hel ha gante vo dalc'het ;

VII

Penôs fell d'imp da viken miret hon brezoneg
Ma vo desket er skoliou war'n dro gant ar galleg...
Huchomp a-bouez hon pennou : Bevet hon Breiz-Izel !
Buhe hir d'id-te yez koz ; nan, n'hellez ket mervel.

DOUSIG KOANT

War eùn ton poblus a vro Kemri

I

Lugerni 'ra stered,
Dousig koant, dousig koant,
Al loar zo dispaket
Dousig koant.
Tol warnon ma c'harante
Eur zellig a drugare
Me da gar gant follente
Dousig koant, dousig koant.

II

N'ezen noz a tremen
Dousig koant...
Sevel ra ar c'hlizen
Dousig koant.
Daeloù perlez zo skuilhet
War ar bokedou kousket
Me, siouaz, zo ankeniet
Dousig koant....

III

Selaou ta ma feden
Dousig koant...
Ma tec'ho ma anken
Dousig koant
Gra ma gwir ma hunvre
Ro ar peoc'h d'am îne
Me vo eüruz neuze
Dousig koant...

Erwan D'HERBAIS

C'hewc'h kwennek ar pez.

*Kanaouennou gwerzet ewit harpan « **WAR ZAO** »*

Kelaouenn brezonek poblus

*grèt gant micherourien ha kouerien évit udsevel hon Bro
Dek real ar blå : Skriva da Loeiz Derrien,
Route de Callac, Gwengamp.*

Moullerez Ar Gwen - Landreger.